

西湖志卷之四十

藝文十

詞

憶江南

唐白居易

江南憶最憶是杭州山寺月中尋桂子郡亭枕上看潮頭何日更重遊

河滿子

陪杭守泛湖夜歸

宋張先

溪女送花隨處沙鷗避樂分行游舸已如圖障裏小屏猶畫瀟湘人面新生酒艷日痕更欲春長衣上交枝

西湖志

卷四

藝文十

一

鬪色釵頭比翼相雙片段落霞明水底風紋時動粧光寶從夜歸無月千燈萬火湖塘

山亭宴

湖亭燕別

宋張先

碧波落日寒煙聚望遙山迷離紅樹小艇載人來約樽酒商量岐路衰柳斷橋西共攜手攀條無語水際見鷺鳧一對對眠沙漱西陵松柏青如故翦煙花幽蘭啼露油壁間花驄那禁得風吹細雨饒他此後更思量總莫似當筵情緒鏡面涼波平照幾度人來去

望海潮

宋柳永

東南形勝三吳都會錢塘自古繁華煙柳畫橋風簾翠
幙參差十萬人家雲樹繞隄沙怒濤卷霜雪天塹無涯
市列珠璣戶盈羅綺競豪華重湖疊巘清佳有三秋
桂子十里荷花羌笛弄晴菱歌泛夜嬉嬉釣叟蓮娃千
騎擁萬牙乘醉聽歌鼓吟賞煙霞異日圖將好景歸去
鳳池誇

菩薩蠻

西湖送述古

宋蘇軾

秋風湖上蕭蕭雨使君欲去還留住今日謾留君明朝
愁殺人佳人千點淚灑向長河水不用斂雙蛾路人
西湖志

卷四

藝文十

二

啼更多

好事近

湖上

宋蘇軾

湖上雨晴時秋水半篙初沒朱檻俯窺寒鑑照衰顏華
髮醉中欲墮白綸巾溪風漾流月獨棹小舟歸去任
煙波飄兀

行香子

懷舊

宋蘇軾

攜手江村梅雪飄裙情何限處處銷魂故人不見舊曲
重聞向望湖樓孤山寺湧金門尋常行處題詩千首
繡羅衫與拂紅塵別來相憶知是何人有湖中月江邊

柳隴頭雲

浣溪沙 五月西湖

宋 蔡伸

雙鳳雷文拂手香青紗衫子淡梳粧冰姿綽約自生涼
虛掉玉釵驚翡翠緩移蘭棹趁鴛鴦鬢髮風亂綠雲
長

臨江仙 與客湖上飲

宋 葉夢得

不見跳珠翻曲港湖邊特地經過蕭蕭疎雨亂風荷微
雲吹盡散涼月墮平波 白酒一杯還徑醉歸來散髮
婆婆無人能唱采菱歌小軒欹枕簟簷影掛星河

西湖志

卷四 藝文十

三

水龍吟 西湖讌客

宋 葉夢得

對花常欲留春恨春故遣花飛早晚來雨過綠陰新處
幾番芳草一片飄時已知消滅滿庭誰掃料多情也似
愁人易感先催趁朱顏老 猶有清明未過但狂風匆
匆難保酒醒夢斷年年此恨不禁煙草只恐春工應留
芳信與花爭好有姚黃一朵殷勤付與送金杯倒

畫堂春 游西湖有感

宋 趙長卿

湖光乘雨碧連天繞堤映草芊芊舞風楊柳欲吹綿依
依起翠煙 還是春風客路對花空負嬋娟暮寒樓閣

碧雲間羅袖成斑

柳梢青 臨安春會汎湖

宋 曾 覲

花柳爭春湖山競秀恰近清明綺席從容蘭舟搖曳穩
汎波平 君恩許宴簪纓密座促仍多故情一部清音
兩行紅粉醉入嚴城

又 游湖

宋 曾 覲

湖岸千峰嵌巖隱映綠竹青松古寺東西樓臺上下煙
霧冥濛 波光萬頃溶溶人面與荷花共紅撥棹歸歟
一天明月十里香風

西湖志

卷四 藝文十

四

小重山

與客游西湖

宋 辛棄疾

綠漲連雲翠拂空十分風月處着衰翁垂楊影斷岸西
東君恩且教重種芙蓉 十里水晶宮有時騎馬笑兒
童殷勤却謝打頭風船兒住且醉浪花中

摸魚兒 湖上

宋 杜 旗

泛扁舟萬山環處平鋪碧浪千頃仙人憐我征塵久借
與夢游清枕風乍靜兩岸羣峰倒浸玻璃影樓臺相映
更日薄煙輕落花似醉飛鳥墮寒鏡 城闌內羅綺千
街萬井天教此地幽勝仇池仙伯今何在隄柳幾眠還

醒君試問問此意只今更有何人領功名未竟待學鴟
夷仍攜西子來動五湖興

阮郎歸 西湖春暮

宋 馬莊父

清明寒食不多時香紅漸漸稀番騰妝束鬧蘇堤留春
春怎知 花褪雨絮沾泥凌波寸不移三三兩兩叫船
兒人歸春也歸

烏夜啼 西湖

宋 盧祖臯

漾暖紋波颭颭吹晴絲雨濛濛輕衫短帽西湖路花氣
撲青驄 鬪草褰衣濕翠秋千瞥眼飛紅日長不放春

西湖志

卷四 藝文十

五

醪困立盡海棠風

卜算子 春晚泛西湖同寅齋賦

宋 高觀國

屈指數春來彈指驚春去檐外蛛絲網落花也要留春
住 幾日喜春晴幾夜愁春雨十二雕牕六曲屏題徧
傷春句

蝶戀花 湖頭即席

宋 高觀國

西子湖邊眉翠嫵魂冷孤山誰是風煙主相喚吟詩天
欲雨嫩涼不隔鷗飛處 移下天孫雲錦渚翠蓋牽風
綽約凌波女清約已成君記取月明夜半魚龍舞

賀新郎 西湖月下

宋 史達祖

同住西山下是天地中間愛酒能詩之社船向西陵佳處放塵世必無知者暑不到雪宮風榭楚竹忽然呼月上被東西幾葉雲縈惹雲散去笑聲罷 清樽莫為嬋娟瀉為狂吟醉舞毋失晉人風雅踏碎橋邊楊柳影不聽漁樵閒話更欲舉空杯相謝北斗以南如此幾想吾曹便是神仙也問今夜是何夜

點絳脣

六月十四夜與社友泛湖過西泠橋已子夜矣

宋 史達祖

山月隨人翠蘋分破秋山影釣船歸盡橋外詩心迴

西湖志

卷四 藝文十

六

多少荷花不盡鴛鴦冷西風定可憐潘鬢偏浸秦臺鏡

青玉案

西湖路

宋 韓 澆

蘇公堤上西湖路柳外約青驄去多少韶華驚暗度南山游遍北山歸後總是題詩處 如今老矣傷春暮澤畔行吟漫尋句拓落情懷空自許小園芳草短籬修竹點點飛花雨

菩薩蠻

湖上

宋 洪 璚

吳姬壓酒浮紅蟻少年未飲心先醉駐馬綠楊陰酒樓三月春 相看成一笑遺恨知多少回首欲魂消長橋

連短橋

掃花遊

西湖寒食

宋 吳文英

冷空淡碧帶翳柳輕雲護花深霧艷晨易午正笙簫競
波綺羅爭路驟捲風埃半掩長蛾翠嫵散紅縷漸紅濕
杏泥愁燕無語 乘蓋爭避處就解珮旗亭故人相遇
恨春太妬濺行裙更惜鳳鈎塵汚酌入梅根萬點啼痕
樹峭寒暮更蕭蕭隴頭人去

賀新郎

湖上有贈

宋 吳文英

湖上芙蓉早向北山山深霧冷更看花好流水茫茫城

西湖志

卷四

藝文十

七

下夢空指游仙路杳笑羅障雲屏親到雪玉肌膚春溫
夜飲湖光山渌成花貌臨澗水弄清照 着愁不盡宮
眉小聽一聲相思曲裏賦情多少紅日欄干鴛鴦枕那
枉裙腰褪了算誰識垂楊秋裏不是秦樓無緣分點吳
霜羞帶簪花帽但滯酒任天曉

西子妝

夢窗自度腔 湖上清明薄遊

宋 吳文英

流水麴塵艷陽釀酒畫舸游情如霧笑拈芳草不知名
乍凌波斷橋西塊垂楊漫舞總不解將春繫住燕歸來
問綵繩纖手如今何許 歡盟悞一箭流光又趁寒食

去不堪衰髮著飛花傍綠陰冷煙深樹元都秀句記前
度劉郎曾賦最傷心一片孤山細雨

渡江雲

西湖清明

宋 吳文英

羞紅顰淺恨晚風未落片繡點重茵舊堤分燕尾桂棹
輕鷗寶勒倚殘雲千絲怨碧漸路入仙塢迷津腸漫回
隔花時見背面楚腰身 逡巡題門惆悵墮履牽縈數
幽期難准還始覺留情轉眼帶減因春明朝事與孤煙
冷做滿湖風雨愁人山黛映澄波淡淥無痕

摸魚兒

西湖游春

宋 陳允平

西湖志

卷四

藝文十

八

倚東風畫欄十二芳陰簾幕低護玉屏翠冷梨花瘦寂
寞小樓煙雨腸斷處悵折柳柔情舊別長亭路年華似
羽任錦瑟聲寒瓊簫夢遠羞對彩鸞舞 文園賦重憶
河橋眉嫵啼痕猶濺紈素丁香共結相思恨空託繡羅
金縷春已暮縱燕約鶯盟無計留春住傷春倦旅趁暗
綠稀紅扁舟短棹載酒送春去

曲遊春

游西湖

宋 周密

禁苑春風外颺暖絲晴絮春思如織燕約鶯期惱芳情
偏在翠深紅隙漠漠香塵隔沸十里亂絲叢笛看畫船

盡入西村閑却半湖春色 柳陌新煙凝碧映簾底宮
眉堤上游勒輕暝籠寒怕梨雲夢冷杏香愁幕歌管酌
寒食奈蛩怨良宵岑寂正恁醉月搖花怎生去得

秋霽 秋日游西湖

宋 周密

重到西泠記芳園載酒畫舸橫笛水曲芙蓉渚邊鷗鷺
依依似舊相識年華易失斷橋幾換垂楊色謾自惜愁
損庾郎雙鬢點華白 殘蛩露草怨蝶寒花轉眼西風
又成陳迹歎如今才消量減尊前辜負醉吟筆欲寄遠
情秋水隔舊遊空在凭高望極斜陽亂山浮紫暮雲凝
碧

西湖志

卷四

藝文十

九

祝英臺近

重過西湖書所見

宋 張炎

水西船山北酒多為買春去事與雲消飛過舊時雨謾
留一掬相思待題紅葉柰紅葉更無題處 正延佇亂
花渾不知名嬌小未成語短棹輕裝逢迎斷橋語那知
楊柳風流柳猶如此更休道少年張緒

春從天上來

自東越還西湖飲
靜傳董高士書樓

宋 張炎

海上回槎認舊時鷗鷺猶戀蒹葭影散香消水流雲在
疎樹十里寒沙難問錢塘蘇小都不見擘竹分茶自堪

嗟向荻花江上誰弄琵琶 煙霞自延殘照盡換了西
陵窈窕紋紗蝴蝶飛來不知是夢猶疑春在鄰家一掬
幽懷難寫春何處春已天涯減繁華是山中杜宇不是
楊花

聲聲慢 西湖

宋張炎

晴光轉柳曉氣分嵐何人野渡橫舟斷柳枯蟬涼意正
滿西州匆匆載花載酒便無情也是風流芳晝短柰不
堪秋夜秉燭來遊 誰識山中朝暮向白雲一笑今古
無愁散髮吟商此興萬里悠悠清狂未應似我倚高寒
西湖志 卷四 藝文十 十

隔水呼鷗須待月許多情都付與秋

探芳信

西湖春感

宋張炎

坐清晝正冶思縈花餘醒倦酒甚採芳人老芳心尚如
舊銷魂忍說繁華事不是因春瘦向西園竹掃頽垣蔓
延荒甃 風雨夜來驟歎歌冷鶯簾恨凝蛾岫愁到今
年多似去年否賦情懶聽山陽笛目極空搔首我何堪
老却江潭深柳

高陽臺

西湖春感

宋張炎

接葉巢鶯平波卷絮斷橋斜日歸船能幾番游看花又

是明年東風且伴薔薇住到薔薇春已堪憐更淒然萬
綠西泠一抹荒煙 當年燕子知何處但苔深韋曲草
暗斜川見說新愁如今也到鷗邊無心再續笙歌夢掩
重門淺醉悶眠莫開簾怕見飛花怕聽啼鶻

多麗

西湖

宋 石孝友

晚山青一川雲樹冥冥正參差煙凝紫翠斜陽畫出南
屏館娃歸吳臺游鹿銅仙去漢苑飛螢懷古情多凭高
望極且將樽酒慰漂零自湖上愛梅仙遠鶴夢幾時醒
空留得六橋疎柳孤嶼危亭 待蘇堤歌聲散盡更須

西湖志

卷四

藝文十

十

攜妓西泠藕花深雨涼翡翠菰蒲軟風弄蜻蜓澄碧生
秋鬧紅駐景采菱新唱最堪聽一片水天無際漁火兩
三星多情月爲人留照未過前汀

繫梧桐

別西湖社友

宋 李 珣

楓葉濃於染秋正老江上征衫寒淺又是秦鴻過霽煙
外寫出離愁幾點年來歲去朝生暮落人似吳潮展轉
怕聽陽關曲柰短笛喚起天涯情遠 雙筴行春扁舟
嘯晚憶着鷗湖鶯苑小小梅花屋雪月後記把山扉牢
掩惆悵明朝何處故人相望但碧雲半斂定蘇堤重來

時候芳草如剪

柳梢青 憶西湖

宋姚勉

長記西湖水光山色濃淡相宜豐樂樓前湧金門外買
箇船兒而今又是春時清夢只孤山賦詩綠蓋芙蓉
青絲楊柳好在蘇堤

臨江仙 西湖春泛

宋趙潛

堤曲朱墻近遠山明碧瓦高低好風二十四花期驕驄
穿柳去文鷁挾春飛 簫鼓晴雷殷殷笑歌香霧霏霏
閑情不受酒禁持斷橋無立處斜日欲歸時

西湖志

卷四 藝文十

十一

探芳訊

湖上春遊繼草窗韻

宋李彭老

對芳晝甚怕冷添衣傷春疎酒正緋桃如火相看自依
舊閉簾深掩梨花雨誰問東陽瘦幾多時漲綠鶯枝墮
紅鴛鴦 堤上寶鞍驟記草色薰晴波光搖岫蘇小門
前題字尚存否繁華短夢隨流水空有詩千首便休言
張緒風流似柳

曲遊春

清明湖上次草窗韻

宋施岳

畫舸西泠路占柳陰花影芳意如織小楫衝波度麴塵
肩底粉香簾隙岸轉斜陽隔又過盡別船簫笛傍斷橋

翠繞紅圍相對半篙晴色 頃刻千山暮碧向沽酒樓
前猶繫金勒乘月歸來正梨花夜縞海棠煙冪院宇明
寒食醉乍醒一庭春寂任滿身露濕東風欲眠未得

沁園春

西湖酒樓

宋 陳人傑

南北戰爭惟有西湖長如太平看高樓倚郭雲邊蠹棟
小亭連苑波上飛甍太守風流遊人歡暢氣象年來都
斬新鞦韆外賸釵駢玉燕酒列金鯨 人生樂事良辰
况鶯燕聲中長是晴正風嘶寶馬軟紅不動煙分彩鷁
澄碧無聲倚柳分題藉花傳令滿眼繁華無限情誰知

西湖志

卷四

藝文十

三

道有種梅處士貧裡看春

沁園春

西泠橋作

宋 錢繼卓

已遠喧闐漸覺幽涼無過西泠正微霜欲下滿船楓葉
枯荷未盡幾點殘螢鐘入蒼煙山黏遠樹拋卷方知午
夢醒悠然起看文魚唼藻野鶴梳翎 安排綠酒青燈
擬陶寫閒愁向水汀恰薑絲調醋新登蟹俎蕨芽研粉
留作萼羹頗恠山童近添閒供露菊秋葵插滿瓶陶然
醉任人呼馬走我已鴻冥

菩薩蠻

湖上即事

元 劉 因

樓前曲浪歸橈急樓中細雨春風濕終日倚危闌故人
湖上山 高情渾似舊只在東風瘦薄晚去來休裝成
一段愁

朝中措

湖堤晚歸望葛嶺諸山倒影水中
昔趙文敏公常欲畫此故及之

元 張翥

梅花處處滿枝開酒力蕩吟懷煙染藏鴉萬縷東風扶
起春來 幽禽啼樹戲魚跳日水碧如苔若箇仙翁畫
得翠微倒影樓臺

婆羅門引

七月望西湖舟觀水燈一
鼓歸宴楊山居山樓達曙

西湖志

卷四

藝文十

十四

元 張翥

暮天映碧玻璃十頃藻珠宮金波湧出芙蓉誰喚川妃
微步一色夜妝紅看光搖星漢起舞魚龍 月華正中
畫船漾藕花風聲度鸞簫縹緲雁柱玲瓏酒闌興極更
移上瓊樓十二重殘醉醒煙水連空

八聲甘州

秋日西湖泛舟午後
遇雨

元 張翥

向芙蓉湖上駐蘭舟淒冷勝游稀但西陵橋外北山堤
畔殘柳依依追憶鶯花舊夢回首冷煙霏惟有盟鷗好
時傍人飛 聽取紅顏象板儘歌回彩扇舞換仙衣正

白蘋風急吹雨暗斜暉空惆悵離懷未展更酒邊忍又
送將歸江南客此生心事只在漁磯

摸魚兒

春日西湖泛舟

元 張翥

漲西湖半篙新雨麴塵波外風軟蘭舟同上鴛鴦浦天
氣嫩寒輕暖簾半捲看一縷歌雲不礙桃花扇鶯嬌燕
婉任狂客無腸王孫有恨莫放酒杯淺 垂楊岸何處
紅亭翠館如今遊興全嬾山容水態依然好惟有綺羅
雲散君不見歌舞地青蕪滿目成秋苑斜陽又晚正落
絮飛花將春欲去目送水天遠

西湖志

卷四

藝文十

十五

多麗

清明飲西湖壽樂園

元 張翥

鳳凰簫新聲遠度蘭橈漾東風湖光十里參差綠港紅
橋暖雲蘸鬱金衫色晴煙抹翡翠裙腰罨畫名園鬧紅
芳樹蒲葵亭畔綵繩搖鴛鴦落英堪藉猶作帶人嬌漬
羅袂莫愁痕退生怕香銷 憶當年尊前扇底多情冶
葉倡條分蘭女隔花偷盼修禊客臨水相招舊約尋歡
新聲換譜三生夢裡可憐宵縱留得棟花寒在啼鴉已
無聊江南恨越王臺下幾度回潮

蝶戀花

西湖感舊

元 葉森

小院閑春愁幾許目斷行雲醉憶曾游處寂寞而今芳
草路年年綠遍清明雨花影重簾斜日暮酒冷香溫
幽恨無人顧一陣東風吹柳絮又隨燕子西泠去

八聲甘州

戊申再到西湖

元張埜

憶湖光醉別幾經春千里每神馳恨無窮煙水無情歲
月無限相思冰雪從來憑眺風沙夢覺山色碧參差忙
對玻璃鏡照我塵姿欲寫從前離闊便安排舊畫准
備新詩見六橋遺構煙雨強撐支怨東風紅銷翠減比
向來渾是老西施如何得劉郎雙鬢長似當時

西湖志

卷四

藝文十

十六

水龍吟

題湖山勝槩寺

元張埜

翠微曾共登臨冷光潏灩三千頃玉京佳處景雖天造
也因人勝若把西施淡粧濃抹兩相比並道此間如對
姮娥仙子慵梳掠臨鴛鏡滿意曲闌芳徑早安排雨
篷煙艇茶甌雪卷紋楸雹碎醉魂初醒湖海高情林泉
情意幾人能領算知音只有中宵涼月浸蓬萊影

賀新郎

題王守西湖書院

元劉鎮

雲淡天垂野望晴郊疎煙半捲斷虹低跨老樹連陰藏
遠景十里湖光照夜看不盡真山圖畫春滿軒窗無着

處更銀蟾冷浸鴛鴦瓦人共境轉幽雅 文章太守歸
來也似當年和靖風流小孤山下問訊佩蘭餐菊友曾
約梅兄入社待付與竹臞陶寫塵外閑尋行樂地任傍
人歌舞喧臺榭詩世界有王謝

望江南四首

為太原陳壅千戶賦西湖景

明 瞿 佑

西湖景春日最宜晴花底管絃公子宴水邊羅綺麗人
行十里按歌聲

西湖景夏日正堪遊金勒馬嘶垂柳岸紅妝人泛采蓮
舟驚起水中鷗

西湖志

卷四

藝文十

七

西湖景秋日更宜觀桂子岡巒金粟富芙蓉洲渚采菱
閒爽氣滿前山

西湖景冬日最清奇賞雪樓臺評酒價觀梅園圃訂春
期共醉太平時

滿庭芳

西湖秋泛

明 瞿 佑

露葦催黃煙蒲駐綠水光山色相連紅衣落盡辜負採
蓮船點檢六橋楊柳但幾個抱葉殘蟬秋容晚雲寒雁
背風冷鷺鷥肩 華筵容易散愁添酒量病減詩顛况
情懷冲淡漸入中年掃退舞裙歌扇盡付與一枕高眠

清閑好脫巾露髮仰面看青天

憶秦娥 湖上次韻

明史鑑

湖邊寺樓臺舊是春遊地春遊地千花張錦兩山橫翠

西風闌檻秋無際青山不改朱顏異朱顏異斷橋楊

柳伴人憔悴

念奴嬌 西湖

明張文秀

平湖秋霽見銀蟾光閃波紋搖綠天上飄來風韻細桂

子香生金粟玉戶玲瓏瑤臺皎潔影落嫦娥屋夜深雲

際一聲誰弄橫竹 醉倚六曲雕闌望中懸白練兩峰

西湖志

卷四 藝文十

六

垂瀑淨洗塵腸摘秀句一唾珠璣千斛更欲凌空鏗鏘

環珮仙駕駮鸞鵠鳳棲人遠獨憐不見秦玉

摘得新 西湖感舊

明夏言

猶是西泠橋畔難尋春柳春花只有婆娑老樹夕陽依

舊樓鴉

清平樂 游西湖用王介甫韻

明陳霆

香車隘住笑揭紅蓮語淺蹴芳塵羅襪汙堤上未乾花

雨 畫船載得琵琶醉中情思無涯不管湖煙湖水東

風取意飛花

水慢聲

西湖

明屠隆

一片大湖何限浸空城碧浪崔巍白日孤懸畫屏四合
翠微裏湧出樓臺落盡桐花飄殘柳絮正芙蕖冉冉將
開衣上冷香飛欲濕輕鷗如帶蘭槳共滌洄天放閒
人時容傲吏水雲深處相對且銜杯君莫對此景浪生
憂喜請看層波疊疊前後相催楚楚舞裙盈盈歌扇零
落總成灰君去也西湖無恙歌舞又重來

小重山

湖上春遊

明裘律

山遶平湖寺遶山隄邊千樹柳綠絲繁杏花嬌倚玉欄

西湖志

卷四

藝文十

九

干秦樓畔小鳥語綿蠻

紅粉試輕紈笙歌吹畫舫漾

飛鸞酒旗撩亂繫雕鞍春色暖芳草弄晴灣

國朝

滿江紅

西湖感舊

董俞

繡甸春濃酒帘外青山無數還記得桃花滿院劉
郎前度紅燭畫橈臨別酒碧簫殘雨相思路看韶
光零落斷橋邊斜陽暮無限景煙中樹無限意
風前絮對澄湖如鏡玉人何處艷影尚疑花欲笑
離情只有鶯能訴歎西陵松柏自年年風流誤

惜分飛

湖上有贈

王士祿

淚眼非如潮有信話到離愁便暈此際看尤俊橫
波那爲多啼損 家住西泠還較近蘇小同心試
問莫忘相思分却教油壁全無準

忘分並
反聲

唐多令

西湖春雪

唐濟武

路斷捕魚汀煙迷放鶴亭望雙峰晝掩銀屏欲訪
剡溪人盡去誰識得少微星 梅落笛難聽暗香
供素瓶擘藤箋欲告山靈明日六橋花外路須早
放柳條青

西湖志

卷四

藝文十

二十

綺羅香

西湖清明

吳綺

風報桐花雨吹榆片春事三分啼鴉人在湖頭正
值禁煙初熟看十里入眼風光是一歲銷魂時節
又誰禁南北峰頭紙錢恰化孤山蝶 樓邊紅袖
徒倚聽得賣餠人過玉笙吹徹笑指西陵松栢何
年堪結莫等待潑火霏微却做作打球周折且分
付簫鼓樓船載多情夜月

青玉案

紫雲洞

吳綺

遙看鳥道渾無路但一澗沿花去澗盡忽逢雲宿

處藤蘿日月莓苔今古撐得媧天住 陰陰石磴
鳴仙鼠百狀虬龍向人舞足下分明聞客語沾衣
空翠濛濛煙霧忽作山中雨

一痕眉碧

湖上行春

丁澎

風送畫橋春渌戲水紫鴛爭逐柳花落盡短長亭
偏亂惹低鬟綠 人倚翠樓如玉忍使嫵眉長
鷓鴣飛上竹枝啼停尊且盡吳娘曲

鷓鴣天

西湖即事

徐鉉

似鏡湖光正可憐六橋楊柳更含煙朱樓窈窕迷

西湖志

卷四

藝文十

五

芳樹石馬淒涼冷墓田 人似玉酒如泉朝朝攜
上木蘭船盡聽商婦彈紅淚猶擲歌兒買笑錢

翠華引

題湖心亭

徐鉉

絃筦四時繚繞樓臺三面參差山色喜晴喜雨湖
光宜酒宜詩

望江南

湖上同萬年少聯句

胡介

寒食後千里見湖山暮雨自能催客淚春風不住
送人船今日記今年

少年

殘照裏歸去獨登樓短

笛杏花看過馬紅衫窄袖控吳鉤風景似徐州

遠

浣溪紗

西湖早春

朱彝尊

雪帶東風洗畫屏

許

便教鶯語太丁寧

杜甫

看花多

上水心亭

張籍

隔岸春雲邀翰墨

高適

傍檐煙雨濕

巖扃

韋莊

瓦甌斟酒暮山青

崔道融

南歌子

早秋西湖

朱彝尊

桂楫中流望

丁仙芝

荷花鏡裏香

李白

無數紫鴛鴦

余延

壽嬋娟江上月

劉長卿

拂羅裳

閻朝隱

多麗

湖上贈竹逸

陸嘉淑

愛明湖晚來千頃秋清更霧髻雲鬟不定吳山鷺

西湖志

卷四

藝文十

三

嶺南屏遙天接三層西竺輕綃捲一片孤城紅糝

江楓青留岸草百年風景見昇平高低繞名園別

墅處處倚雕楹笙歌好尋芳拾翠棹槳縱橫待

重來山川如昨一尊寂寞頻傾戍煙空橫飄斷角

山鐘暗怒吼霜鯨紫燕空歸塞鴻不斷西風緊處

聽殘鶯還應賴登臨讌集相向寫幽情高吟罷客

歸人醉纖月初生

又 西湖

吳農祥

夢澄湖畫橋春水初生指嫋娜東風吹晚朦朧西

日籠晴雕梁棲雙飛社燕瓊樓閃百轉流鶯潮信
蒸梅雨梢墜柳惱人情緒是清明平沙軟爭攜新
月壓浪小舟輕追歡好爲他拚醉醉也還傾待
空閨重尋消息繡簾同出江城玉釵垂暖圍紫蓋
珠衣薄難掩紅屏拾翠時光踏青心事香塵蕩去
促歸程冶遊久歌慵舞罷寂寞已三更徒贏得歲
華紀盡越鼓吳笙

倦尋芳

湖上春遊

邵錫榮

嫩柳搖風天桃凝露十分春色潏灩湖光影漾畫

西湖志

卷四

藝文十

三

樓簾額驟金鞍揚寶轡踏殘芳草連錢碧看家家
正除煙斷火初逢寒食六橋邊芳菲未老一陣
飛花驀地狼籍又被鶯啼啼落滿隄斜日望去青
帘飄野店酒濃如霧吹還濕醉歸時聽孤村數聲
橫笛

長相思

西湖秋景

梁允植

楓葉紅柿葉紅誰染丹青峭壁中霜寒五兩風
白雲封碧雲封雲鎖南屏第幾重長廊薄暮鐘

小重山

西湖晚眺

梁允植

錦帶橋頭叫杜鵑雪初晴正是落霞天紅塵漸負
碧山緣偷閒處湖水散鳴弦 春色在籬邊小堤
梅欲吐又殘年何時返棹米家船看雁影箇箇入
幽燕

臨江仙 湖上

陸鴻圖

十二橋頭春事早花間試買屠蘇小姑十五學當
壚可憐垂素手不慣數青蚨 踏碎殘紅堤路滑
杖頭珍重葫蘆東風吹雨過平蕪欲尋逋老約喚
取醉翁扶

西湖志

卷四 藝文十

二

瑣窗寒

憶西湖四時

孫琮

十二橋頭四時簫鼓屢縈心曲晚霧朝煙風靜水
紋如縠踏青遊鶯燕撩人蒲觴競看飛鳧速正荷
香盪漿萬縈翠蓋千頃紅玉 遙矚澄湖面有微
曉明燈錦團霞簇清秋浩月夜夜盤桓難足喜重
陽雨後初晴葱菁草樹如新沐更羣巒積雪憑高
望兩峰三竺

昭君怨

西湖暑遊

徐士俊

昨日南屏蕭寺今日西泠梅峙銷夏柳陰邊小篷

船 纜買旗亭茶醉又趁蓮塘香睡白雪映清漣
鷺鷥肩

念奴嬌 湖夜

嚴繩孫

浮生夢裡更能得幾度人間今夕西子湖頭秋已
半清景似曾相識銀渚雲開珠胎月滿一片傷心
碧姮娥知否照人如此清切 試望蘇小西陵如
今松柏盡難尋油壁星火樓臺永夜舟不是舊游
踪跡病憶愁吟有荷花笑我百端交集數聲何處
夜分猶自吹笛

西湖志

卷四 藝文十

三

金菊對芙蓉 西湖

毛際可

烏柏開餘蕙花零後斜陽目送賓鴻正煙嵐深處
暫息游筇憑高一色天連水見飛來恠石玲瓏西
陵橋畔蘭舟畫舫一葉杯中 喚起絕壑癡龍把
珠璣萬斛灑向池東更碧筒徐引曲折流通家僮
敲石燒茶竈試新泉蠓眼松風歸來月下回頭精
舍宵靜聞鐘

點絳脣 與梁九坐斷橋

沈進

鏡裏秦箏聽來無限清秋怨畫船分散一抹銀波

爛 折得荷花爭似情人面西風亂浮雲天畔雁
字虛傳徧

蝶戀花

西湖述感

沈進

客裏秋聲驚別緒竹雨荷風日日消殘暑水國涼
生漁唱起晴雲綠處移柔櫓側帽看山誰是主
數遍紅樓樓下沾清醕臨水小窗聞燕語珠簾不
捲歌金縷

采桑子

湖上春遊

沈進

玉鞭去馬嬌無力草似情濃柳似心慵剪剪輕衣

西湖志

卷四

藝文十

三

蛺蝶風 纔移綠水船窗近南也高峰北也高峰
兩處花飛一片紅

南樓令

泛月至湖心亭

沈進

落月四無塵天青雁幾羣倚輕橈客過前津未老
芙蓉秋有恨對粧鏡翠蛾顰亭子隔湖心花深
月轉深聽宵鐘空外遺音絲竹不分山水興約明
日再登臨

柳梢青

西湖後遊

沈進

十二重樓是誰珠箔雙掩銀鈎桃葉春潮楊花暮

雨一段閒愁 飛來沙際輕鷗芳草外春風舊遊
團扇歌殘羅衣試罷人在蘭舟

菩薩蠻

春日憶西湖次陸蓋
思徐竹逸倡和原韻

陳維崧

劃波曾向西泠去掠入綠痕難唾處疎簾雜眠鷗
真成自在遊 如今佳興歇悶過春三月剛見摘

蘭芽山村又焙茶

柳梢青

和沈山子西湖後遊

李符

前度芳遊裙腰草外綠漾輕舟渡口飛花波心掠
燕人倚紅樓 重來緩控嘶驄悄不見疎簾上鈎

西湖志

卷四

藝文十

三

一鏡空香雙螺斜照都是春愁

秋霽

泛舟西湖薄暮坐湖心亭待月

龔翔麟

買酒西泠正蕭蕭雨歇白羽風淨別浦喧禽長堤
無柳六橋空帶煙暝采菱歌靜劃波又見拏魚艇
但目極南北兩岸斜照亂紅影 湖心亭子遊屐
都歸留與吾曹夜涼飲謝多情纖阿放彩鴛鴦露
宿不知冷半被朗吟驚乍醒夢梁堪憶紅蕖種滿
芳塘月中香遠一奩秋錦

吳山青

湖上遇雨

龔翔麟

南高峰北高峰好在空濛雨色中
煙鬟霧鬢重
藕花紅蓼花紅不比當年秋興濃
采香何處逢

柳梢青

西湖後游和沈山子

龔翔麟

十二橋邊紅消燕夜綠漲鶯天
楊尾梳風櫻珠捎
雨日上歌船 依然鈿翠生煙
認亭子湖心扣舷
勸酒僧歸鏡詩壁壞苦憶嬋娟

南鄉子

烏石山房即目

龔翔麟

千縷裊茶煙消受松風一榻前
小雨初收簾試捲
山四面洗出佛頭青萬點

西湖志

卷四

藝文十

三

臨江仙

西湖秋泛

查慎行

記得樓亭春侍讌滿湖燈燭熏
天一番光景換尊
前殘荷猶瀉雨疎柳已無蟬
望望西泠橋外去
吟過第六橋邊商聲輓上十三絃
晚風吹不斷涼
透鷺鷥肩

桂殿秋

湖樓感興

沈季友

葛嶺背斷橋頭青山何事不勾留
愁人怕見西湖
面冷雨疎花共一樓

點絳脣

湖上

釋正巖

來往煙波此生自號西湖長輕風小槳盪出蘆花
港得意高歌夜靜聲偏朗無人賞自家拍掌唱
得千山響

西湖志

卷四

藝文十

三